

近代中國史料叢刊第九十七輯

沈雲龍主編

范忠貞公（承謨）全集

龍錫慶重刊

文海出版社  
有限公司印行

沈雲龍教授主編

近代中國史料叢刊

第九十七輯

文海出版社  
有限公司印行

范忠貞公  
全集

重刊范忠貞公全集敘

自來節烈之士視義之所在雖鼎鑊白刃之在前而甘之若飴履之若平坦誠得死所了無遺憾安有於後世之名稱借文章以增重哉而其爲文卒不少晦者效忠仗義之人其精氣光怪皆天地嚴凝之氣之不能澌滅國家培養之厚教澤入人之深之有以收其效私之者得其遺楮或精粹一二語如吉光片羽以爲寶貴焉有志於扶世翼教者哀輯叢殘以垂世而行遠令讀者神王聞者興起脩脩然浸淫鼓舞以發其忠愛之忱而不容自己昔韓子有云和平之音澹薄而愁思之聲要妙懼愉之辭難工而窮苦之言易好故文章之作王公貴人氣滿志得非

性而好之則不暇以爲歐陽子亦云搢紳之裔安其祿而入其朝充然無復廉恥之色故自古忠義士多出於亂世而怪當盛時可道者之少由二公之言世家子弟又躬際承平其不能樹奇節以著奇文者比比然已而我

朝范忠貞公獨不然公既授命其子兵部尙書時崇錄遺稿進呈

聖祖仁皇帝親爲製序惜其書世少流傳比官南嶠與張悔甫學博往還得公全集盡讀之至畫壁一卷悲壯蒼涼痛切不忍卒讀乃廢書而歎曰嗚呼忠貞非世家子弟又躬際承平者耶非能樹奇節以成奇文者耶同時被繫諸君其著述或傳或不

傳而幽閉至七百餘日之久殉難至五十三人之多非皆身受  
朝廷之祿養徒以公忠憤所感從容赴義如彼非  
國家培養之厚教澤入人之深之有以收其效耶乃二百餘年  
凌夷以至於今邊氛屢警潰敗逃亡效忠仗義之眾不克媿於  
國初盛時倉卒之變綱常風教掃地殆盡爲外夷之所羞此有  
心世道者所爲痛哭流涕長太息者也公之毅魄英魂與日星  
同照固不必以文傳而其文之卓卓可傳若是爰爲校其譌奪  
其有表彰之作可以見公生平者兼收博載并傳其幕客之文  
亦同附錄都爲六卷重付手民欲使讀是集者浸淫鼓舞以發  
其忠愛之忱而不容自己以輓回世道人心之陵替是則錫賚

重刊此書之志已

光緒二十一年歲在乙未湘南安化龍錫慶謹序

凡例

一原刻五卷一撫浙奏議附告病咨文二督閩奏議三吾廬存稿四百苦吟五畫壁遺稿今恭錄 聖祖仁皇帝御製文並國史本傳以及各家所撰本傳先正事略等篇爲卷首次閩浙奏議次吾廬存稿次畫壁遺稿次百苦吟次附錄一卷增爲六卷部次差不攙紊

一原刻卷首只錄郭文清菴所撰本傳一篇今從滿漢名臣傳內錄出 國史本傳更從錢給事儀吉碑傳集內錄出彭中丞鵬戴吉士震所撰本傳又於他刻中摘取傳狀祠堂記等篇補入亦抱遺訂墜之誼也



畫壁遺稿有 聖祖仁皇帝賜序一篇原刻未經恭錄茲因錄得 國史本傳 御序已載篇內故不另刊簡端

一李方伯元度著 國朝先正事略以范文肅居首公爲文肅次子與公子時崇均附立傳今並刊入知承先啟後有由來也

一原刻無詩文目錄茲刻特爲補列俾閱者開卷了然

一原刻吾廬存稿詩列文前畫壁遺稿文列詩前未免兩歧今將吾廬稿詩移文後吳公象贊原刻詩辭篇末今移刻孝婦傳後庶幾斟酌畫一

一原刻百苦吟編列在畫壁遺稿之前惟公被執十日卽得詩

塗壁積三年得詩文九十首曰爲畫壁集其和百苦吟乃備  
嘗諸苦以後之作自應序列畫壁稿後故爲移綴

一增附殉難諸人碑傳表譜事狀書後十二篇均從他刻中錄  
補爲忠貞遺事本末聲氣之同表彰之責也


一 是書坊閒無刻本子官閩嶠麓峯書院監院張悔甫廣文藏  
有原刻思繙刻以廣其傳旋奉 命臬鄂權藩司擢浙藩日  
不暇給亟付崇文書局影鈔倩唐大令監金詳校大令謂體  
例未善遺漏尙多爰其商酌參訂編次補輯越兩月成完帙  
焉



重刻范忠貞公全集

校對職名

湖北宜昌府同知史從鑑	湖北宜昌府同知	湖北教習知縣唐監金	湖北漢川縣知縣陳豪	前安徽歙縣知縣譚廷獻	湖北知州補用候補通判李徵棠
------------	---------	-----------	-----------	------------	---------------



論祭文第一道

維康熙二十年七月十五日 皇帝遣禮部左侍郎楊正中  
諭祭原任福建總督加贈太子少保兵部尚書諡忠貞范承謨  
之靈曰朕惟國家芻蕘臣工凡敷歷中外克著名績者必被以  
厚終之典矧處艱危而孤忠罔替守義分而九死不渝非旌  
揚曷彰憫卹爾范承謨裊躬恪慎奉職勤勞膺簡任於北扉俾  
旬宣於南服懲貪釐弊風裁可觀起瘠振貧惠愛斯在比閩疆  
之移鎮值逆孽之陸梁籌略未施變亂旋及矢丹心於不屈三  
載幽囚蹈白刃以同歸闔門屠戮慘酷斯極獎慰宜優是用贈  
以崇階錫之美諡嗚呼捐軀授命樹臣節於一時厚卹隆褒昭

國恩於奕禩式將芬苾尙克歆承

論祭文第二道

維康熙二十年七月十七日 皇帝遣禮部左侍郎楊正中  
諭祭原任福建總督加贈太子少保兵部尚書諡忠貞范承謨  
之靈曰惟爾矢心報國殉義忘身甫蒞巖疆遽罹狂噬疾風勁  
草視一死以如歸烈燄純鋼經百折而不挫特加優卹以慰忠  
魂再滌牲牢式陳窀穸靈而不昧其欽承之



東洋貿易年表

--	--	--	--	--	--	--	--	--	--	--

御書碑文一道

原任福建總督加贈太子太保兵部尚書諡忠貞范承謨

碑文

朕惟朝廷簡畀重臣授以封疆之任平時則竭誠殫力以靖厥職猝逢事變則有凜乎不可犯確然不可奪之節舍生取義流光天壤古所謂不二心之臣如此而已爾范承謨名臣之子奮迹甲科入侍禁林出典節鉞咸有聲績著於當官洎闕疆蒞鎮之年值狂豎盜兵之日寇起門庭禍生肘腋智未及施勇不暇展而爾志恥倖生義無苟免奮身罵賊誓不共天遂致闔室幽囚三年拘繫阻斂其衣食迫脅以甲兵兇燄彌張貞操愈勁卒

蹈白刃以作完人慷慨從容兼有其美茲者底定疆陲申明命  
討罪人斯得臣節益昭倍深軫悼之情特厚飾終之禮寵以隆  
秩謚曰忠貞嗚呼褒忠顯善帝王治世之大權恩命疊頒朕曷  
有私於爾以培正氣以植人倫庶使巽慊之士覩盛典而知興  
慕義之夫聞休風而加勸勒諸貞石其永有譽於無窮哉

康熙二十一年四月二十六日立

國史本傳

范承謨漢軍廂黃旗人大學士范文程第二子也初任侍衛順治八年更定八旗漢軍考試之例承謨中式舉人明年成進士選庶吉士授宏文院編修十二年選秘書院侍讀學士十八年聖祖仁皇帝御極擢國史院學士康熙三年以疾乞假尋補秘書院學士教習庶吉士充纂修世祖章皇帝實錄副總裁官七年授浙江巡撫九年杭州嘉興湖州紹興諸府被水承謨奏貸藩庫銀八萬兩糴米湖廣以平糴應徵漕米請每石折銀一兩於明年麥熟後徵解其白糧分三年帶徵被災重者如例蠲免並得旨允行先是甯波金華衢台溫處諸府屬荒田以

前任總督趙廷臣請除額賦有旨令承謨履勘至是承謨遍  
歷其地奏豁免荒田地二十九萬四千六百餘畝水衝缺額田  
地二萬一千九百餘畝十年以疾請解任命乘驛回京調理  
浙江總督劉兆麒提督塞白理各疏言浙省年來當荒做時而  
生民不致重困者皆撫臣承謨之力今以病請告百姓投詞攀  
留積一百五十餘紙不敢壅於上聞給事中姜希轍柯聳御  
史何元英等亦言承謨受事三載愛民如子餽遺請謁不通劾  
奏貪墨廉治巨猾剔除加耗陋規私派積弊單騎勘荒悉心賑  
恤浙人愛戴深於飢渴今雖積勞致疾懇特勅勉留上諭  
吏部曰前因浙江巡撫范承謨以患病具奏准其回京調理今

據提督等奏稱百姓愛戴號泣請留情詞懇切特順民情仍留  
原任十一年八月承謨疏言浙省徵輸白糧其加耗多寡不一  
湖州每石加五斗五升嘉興每石加八斗爲運丁春辦諸費請  
嗣後令糧戶以春白米輸納概限加耗四斗五升又請豁台溫  
二衛康熙九年以前荒逋銀兩及石門平陽未完輕賚月糧等  
項皆下戶部議行十月擢福建總督承謨以海疆重任難副辭  
上弗允因疏請  陛見十二年七月至京  召對承謨舊疾  
未痊  上遣御醫診視  賜藥餌逾月疾稍愈  命馳赴新任  
賜冠服鞍馬  遣侍衛烏丹傳  諭曰爾向有賢聲與他人  
不同且福建邊疆重地海氛未靖爾其益加勉勵副朕委任初

福建總督駐漳州至是將撤靖南藩屬還京 特命移駐福州  
承謨奏攜其家屬 賜蒙古壯勇八十餘人以行甫抵任聞逆  
藩吳三桂反承謨察耿精忠有異志綜計督標兵少又與精忠  
所部習不足恃乃疏言閩省經制兵自康熙八年依部議裁汰  
已及三千餘名尙應裁二千五百餘名現在兵單汎廣請暫停  
裁汰遇缺以投誠人充補又請巡行海濱酌寬邊界令民開墾  
分遣鎮兵屯糧隙地以裕軍餉疏上未及行精忠已叛先佯言  
海寇至邀承謨議事巡撫劉秉政陰附精忠促承謨行承謨知  
有變左右請擐甲以從承謨曰眾寡不敵備無益也乃坦然按  
轡至則逆眾蜂屯露刃承謨挺身前抗辭罵賊精忠困以桎梏

閉之隘室晝夜防伺甚密使毋死承謨罵不絕口一日精忠遣  
秉政說之降承謨奮足蹴秉政仆地叱左右掖出曰賊誅戮將  
不遺茲先褫其魄矣爲賊困踰二年冠 賜冠衣辭母時衣每  
朔望奉時憲書一冊懸之北面跪拜間爲詩文以桴炭畫壁上  
當承謨甫爲賊困時部曲有張福建者手雙刀奮呼奪門連斃  
賊人力竭被執死又蒙古人嘛尼爲僞散騎郎精忠遣之守承  
謨感承謨忠義謀使出走事泄精忠將磔之嘛尼大言曰吾甯  
與忠臣俱死不願與爾逆賊同生及大兵破仙霞關精忠將降  
飾辭冀免死忌承謨暴其罪惡夜遣逆黨逼承謨就縊幕賓無  
錫嵇永仁會稽王龍光華亭沈天成從弟承譜及親屬家丁隸



卒五十三人並遇害賊移屍焚諸野黍甯騎兵許鼎夜負承謨  
燼骸藏之明年楓還京 上遣內大臣侍衛奠酒福建巡撫楊  
熙疏列精忠叛後死事諸臣爲承謨請優卹總督耶廷相復專  
疏言承謨於康熙十三年三月精忠邀以會商公事脅之從逆  
承謨憤怒不屈遂遭羈繫至十五年九月十六夜半精忠遣人  
縊之承謨猶言 主恩未報整衣冠叩首然後就縊親屬幕賓  
及隨從諸人盡被縊死閩人追思其任總督時多愛民惠政聞  
遭慘變每酸心掩泣言之其純忠勁節久而愈堅富貴榮利不  
能動其心妻子昆弟不足榮其慮視倉卒遇變激烈捐軀者更  
未易多得乞 勅部優加贈諡卹廕並於閩省立祠褒示以慰

人心 詔所司優議贈兵部尙書加太子少保廕一子入監  
賜祭葬如典禮諡忠貞 御書碑文賜其家三十四年福建巡  
撫卞永譽以士民頌建專祠於福州入奏 御書忠貞炳日以  
額其祠四十七年承謨子時崇官廣東巡撫復疏述前此福建  
督撫爲嵇永仁等請贈部臣以生員無贈銜例寢議乞 特勅  
追贈入祠於是贈嵇永仁王龍光沈天成范承譜國子監助教  
學正有差並從祀承謨祠 世宗憲皇帝時以承謨與嵇永仁  
等入祀昭忠祠承謨所著有吾廬稿浙閩奏議百苦吟畫壁集  
聖祖仁皇帝又嘗允時崇請 御製承謨畫壁集序曰朕惟  
帝王教化首重名節所以維繫人心扶樹綱紀也古人臣以身

事主守土膺疆或遇蝥賊潛生豺狼勃起則捐軀矢志取義成  
仁而其激烈慷慨之氣開發爲文辭雖質直無華後世論錄終  
存不可泯滅者以其出於忠義之誠本乎性情之正也福建總  
督范承謨名臣之子授節閩海方值逆豎盜兵偏隅煽焰籌略  
未展橫罹幽繫閱三寒暑貞操彌堅故其愀然不滓之志縈紆  
鬱屈無所摠露乃以墻壁爲書箋以桴薪爲筆墨題分甲乙字  
辨衡從日月旣深篇章漸積名曰畫壁記實也卒能終始不撓  
歸於正命若承謨者可謂冒白刃而不疑守丹心而自信者矣  
夫以茹荼含槩之餘每念念不忘君父故詩文不必盡合於古之  
作者而浩然之氣流行充溢當其胷填聲咽髮植風生土塊灰

九同於利劍禿毫斷梗等比霜矛寫忠孝之性靈奪奸凶之殘魄是又豈刻雕藻績塗飾虛浮者之所能及乎自三逆旣滅寰宇謐寧卹典頻加恩綸屢降固已延賞後昆光賈泉壤矣茲特允其子時崇所請復爲序其存稿蓋善善從長春秋之義許章特錫數出非常庶幾追妥忠魂亦以風厲臣節焉

	Date	Particulars	Rs.	Paise	Total	Balance

Handwritten signature or initials in the right margin of the page.

范忠貞公傳

張宸

公諱承謨字觀公太傅文肅公仲子也少沈毅英穎期抱偉岸以忠介稱年十七充侍衛趨跽禁闈勤不廢書順治八年辛卯詔許八旗茂秀子弟應制科公遂以戴記登賢書明年成進士改庶吉士讀書翰林院猶聞日入侍世祖章皇帝嘗詢公家世公具奏聞喜曰是翰林某子耶歎賞者久之詔免扈從俾專意肄業公益力典墳試輒高等授弘文院編修乙未特擢祕書院侍讀學士辛丑升國史院學士今上康熙六年丁未教習庶吉士戊申升都察院右副都御史巡撫浙江公居禁近久謹默自持留心經濟於民生吏治若指掌不尙

辭說以故人罕知者恂恂若儒生而遇事有守嚴氣正性慄不可奪上既親大政思得廉貞以風天下首擢用公公亦毅然以匡濟爲己任及至浙戒部員絕苞苴禁私謁公移呈牒積日不批苔屬吏莫能測居月餘一日而下利弊情形輕重機宜咸悉中僚吏相顧驚服故事制撫授事三月後得劾奏不法吏及期兩司以請曰姑緩之未幾兩司慮愆期復固請且列狀上白哂曰是欲吾舍豺狼而問狐狸耶遣之翌日忽拜疏一時墨吏皆列白簡中僚吏悚息浙故多巨猾假託旗旅縱害百端貧民稱貸者率以旬爲月子大於母不克償則舉室算爲奴又逋逃滋蔓困於僕區者累累公悉奏請禁絕飭旌蘇之侵墳墓者革

守闕卒之私稅蔬果鮭菜者杭俗佞佛好游湖舫僧寮往往少  
長雜沓以爲常爲之勸禁移易瀕海民多黠悍倚私鹽自活公  
以爲不禁則廢法禁之若輩或鋌而走險於是擇山谷州邑商  
船所不及者許其擔負往鬻名曰窮漢鹽疲癯老穉胥得其利  
浙東諸郡田多磽确不任犁鋤或斥鹵不可以粒正供多逋拜  
疏請蠲 朝命履畝覈實公輕騎按行山陬海澨罔不躬歷所  
至山農獻脫粟飯削瓜分果悉慰而啖之民隱悉達疏入報  
可辛亥歲大祲民無食公籲天爲文自罪捐粟設糜請帑金八  
萬乞糴吳楚於是米艘銜尾而至下令平糶民以不飢嘉湖水  
災尤甚請改折漕米二十二萬四千餘石冬大雨雪仍請緩徵



侯明年蠶熟湖州歲例辦南北絲十一萬斤有奇南解江寧北  
解戶部運費不貲請悉交杭州織造局寬民力嘉湖歲輸白糧  
六萬六十餘石玉食所需念災民無力請三年帶徵少緩須臾  
皆得如所請行公感激異數竭心撫綏寢食俱廢夙疾大作疏  
請罷 溫諭允之浙人輟耕罷市號位請留排制府闔畿仆制  
府以 聞 上爲感動溫旨勉令力疾視事壬子拜兵部右侍  
郎兼都察院右副都御史總督福建軍務疏辭不允請陛見  
允之瀕北發浙民送者互二十餘里擁舟不得解維有瞽者百  
輩長號舟前曰小人心感公德恨不能睹公貌願得進抱公足  
摩公衣以釋此憾公矜而許焉所至民扶老攜幼擁拜如前十